

दिनांक 21.06.2025

समय: 18.45 बजे

- अंतर्राष्ट्रीय योग दिवस रे मौके आज पूरी दुनिया मांय एक पृथ्वी-एक स्वास्थ्य संदेश री गूंज रही-योग करोड़ां लोगां ने एकजुट कीना।
- प्रधानमंत्री नरेन्द्र मोदी योग ने शांति री दिशा बतायो-प्रदेश मांय ई योग आयोजना री धूम रही।
- राज्य मांय घणखर ठौड़ां चौमासा री बिरखा-भरतपुर, कोटा अर जयपुर संभाग मांय आवता तीन दिन कठे-कठे भारी ऊं घणी भारी बरसात रा आसार।
- ऊर्जा मंत्री हीरालाल नागर कह्यो-राज्य मांय बिजली बणावण वाळी सगळी इकाइयां मांय कोयला रो भण्डार लगातार पूर्ति तैय करे है।

000

अंतर्राष्ट्रीय योग दिवस रे मौके आज पूरी दुनिया मांय एक पृथ्वी-एक स्वास्थ्य रो संदेश गूंजो अर करोड़ां लोग योग रे मार्फत इण रा महत्त्व ने और मजबूत कीनो। योग दिवस रे मौके 175 देशां मांय लोग योगासन कर र इण ने स्वस्थ अर संतुलित जीवन रो असरदार जरियो बतायो। 11वें अंतर्राष्ट्रीय योग दिवस रे मौके विशाखापत्तनम मांय राख्यी ज्या जळसा मांय प्रधानमंत्री नरेन्द्र मोदी ई शिरकत कीनी। वे योग ने शांति री दिशा बताता थकां विश्व समुदाय ऊं ई दिन ने योग 2.0 री सुरुआत रा तौर ऊं मनावण री अपील कीनी।

योग दिवस रे मौके देशभर मांय सैर-सपाटा री ठौड़ां, स्मारकां, महलां, किलां, बाग-बगीचां, स्टेडियम, दफतरां अर स्कूल-कॉलेजां मांय सामूहिक योगाभ्यास रा कार्यक्रम राख्यी ज्या। राष्ट्रपति द्रौपदी मुर्मू देहरादून मांय राख्यी ज्या योग शिविर मांय शिरकत कीनी। ई मौके वे योग ने बधावो देवण मांय भारत रा काम ने खास बतायो।

लोकसभा अध्यक्ष ओम बिरला संसद परिसर मांय राख्यी ज्या योग दिवस कार्यक्रम मांय शिरकत कीनी। वे कह्यो के योग इंसान रा पूरा विकास मांय खास काम करे है। योग दिवस रे मौके आज पूरो प्रदेश योगमय निजर आयो। जैसलमेर जिला मांय खुहड़ी रा रेतीला धोरां मांय राख्यी ज्या राज्य स्तर रा जळसा मांय मुख्यमंत्री भजनलाल शर्मा कह्यो के पूरी दुनिया योग ने अपना र भारत री ई जूनी रीत रो मान बधायो है। वे कह्यो के योग शरीर अर मन रो स्वास्थ्य अर समरसता रो प्रतीक है।

जयपुर रा सवाईमानसिंह स्टेडियम मांय राख्यी ज्या कार्यक्रम मांय राज्यपाल हरिभाऊ बागडे समेत मोटी तादाद मांय जन समुदाय भागीदारी कीनी। योग दिवस रे मौके प्रदेश रा सगळा जिलां मांय खास जळसा राख र योग रे ज़रिए स्वस्थ जीवन शैली माथे जोर दियो ज्यो। ब्लॉक स्तर अर ग्राम पंचायतां मांय ई स्कूल-कॉलेज, स्टेडियम अर पार्कां मांय संवारे ऊं ई लोगां रे पूगण रो सिलसिलो सुरु व्हे ग्यो। योग री सिखावण देवण वाळां री अगुवाई मांय न्यारा-न्यारा योगासनां रे ज़रिए स्वस्थ रेहवण रो संदेश दियो ज्यो।

000

राज्य मांय घणखर ठौड़ां चौमासा री बिरखा व्हेवण लागी है। मौसम विभाग आज पाली, जोधपुर, जालौर, अजमेर, भीलवाड़ा अर चित्तौड़गढ़ मांय भारी बारिश व्हेवण सारु चेटायो है अर केई जिलां मांय जोरदार बायरो बाजण सागे बिरखा व्हेवण रा आसार जताया है। बारां, कोटा, बूंदी, नागौर, राजसमंद, बीकानेर, बाड़मेर, अर जयपुर समेत केई ठौड़ां बरसात रो येलो अलर्ट जारी करी ज्यो है। मौसम केन्द्र जयपुर रा निदेशक राधेश्याम शर्मा बतायो के भरतपुर, कोटा अर जयपुर संभाग रा कुछ हलकां मांय आवता तीन दिन भारी बारिश व्हेवण री संभावना है।

चित्तौड़गढ़, सवाईमाधोपुर, दौसा, बारां, बूंदी, कोटा अर जयपुर मांय ई चोखी बिरखा व्ही। प्रदेश मांय चौमासा री बिरखा सुरु व्हेवण सागे ई केई ठौड़ां झरना बहवण लाग्या है। जोधपुर मांय खुशनुमा मौसम रो मजो लेवण सारु सैर-सपाटा री ठौड़ां सैलाणी निजर आवण लाग्या है। म्हाणा चित्तौड़गढ़ खबरनवीस बतायो के हरी-भरी वादियां बीचे मेनाल मांय सैलानियां अर गोठ मनावण वाळां री आवाजाही सुरु व्हे गयी है।

000

ऊर्जा मंत्री हीरालाल नागर कह्यो है के प्रदेश मांय बिजली बणावण वाळी सगळी इकाइयां मांय 25 दिन रा कोयला रो भंडार राख्यो जावे है। श्री नागर आज भीलवाड़ा मांय बिजली विभाग रा अहलकारां सागे राख्यी ज्यी मीटिंग मांय बोल रह्या हा। वे कह्यो के कोयलो स्टॉक मांय रेहवण ऊं बिजली री पूर्ति मांय अड़चन नी आवे है। ई पाछे खबरनवीसां सागे बातचीत करता थकां नागर कह्यो के प्रदेश मांय हाल ताई 80 विद्युत आपूर्ति ग्रिड बणा दिया ज्या है।

000

प्रदेश मांय वंदे गंगा जल संरक्षण—जन अभियान ऊं महज़ 15 दिन मांय करीब पौने दो करोड़ लोग जुड़्या है। सामाजिक न्याय अर अधिकारिता मंत्री अविनाश गहलोत आज झुंझुनूं मांय खबरनवीसां सागे बातचीत करता थकां आ जाणकारी दीनी। वे कह्यो के ओ अभियान अब जनता रो आंदोलन बण ग्यो है। श्री गहलोत कह्यो के महिलावां ई ई अभियान मांय बढ़-चढ़ र शिरकत कीनी। वे कह्यो के जन सरोकार ऊं जुड़्यो ओ अभियान लगातार चालण वाळी प्रक्रिया है, जिण ऊं पाणी भेलो करण रा बारा मांय जागरुकता आयी है।

000

भारत, ऑपरेशन सिंधु रा तैत नेपाल अर श्रीलंका रा लोगां ने ई ईरान ऊं हिफाज़त सागे निकाळ रह्यो है। एक सोशल मीडिया पोस्ट रे मुजब क्षेत्रीय सम्प्रभुता रो मान करता थकां नेपाल अर श्रीलंका सरकार री अरज पाछे ओ काम कर्यो जा रह्यो है। भारत सरकार ईरान अर इजराइल बीचे चाल रही लड़ाई ने ध्यान राखता थकां ईरान मांय फंस्या भारत रा लोगां ने वठे ऊं निकाळबा सारू ऑपरेशन सिंधु चलायो है।

000

आज विश्व संगीत दिवस है। संगीत रा न्यारा—न्यारा रूपां ने बधावो देवण सागे संगीत री ताकत ने पिछाणबा अर सुरां रे ज़रिए लोगां ने जोड़बा रा मकसद ऊं ओ दिन मनायो जावे है। इण रो ई साल रो मुद्दो **सद्भाव के माध्यम से उपचार** है।

000

प्रदेश मांय 24 जून ऊं 9 जुलाई ताई पंडित दीनदयाल उपाध्याय अंत्योदय संबल पखवाड़ो मनायो जावेला। ई पखवाड़ा रे दौरान जनता ने सरकार री कल्याणकारी योजनावां रो फायदो दियो जावेला। ई रा पैला दौर मांय 5 हजार गांवां मांय गरीबी री लकीर ऊं नीचे बसर करण वाळां ने इण ऊं ऊंचा उठाया जावेला। ई दौरान हर ग्राम पंचायत मांय शिविर लगाया जावेला। अंत्योदय रो लक्ष्य हासिल करण सारू वंचित तबका री जनता माथे खास ध्यान देता थकां सरकार ओ पखवाड़ो मनावेला। ई सारू गरीबी मुक्त गांव योजना चलायी ज्यी है।

000

डीडवाना—कुचामन जिला रा परबतसर थाना हलका मांय हनुमानगढ़— किशनगढ़ मेगा हाईवे माथे बस अर दो कारां री टक्कर रे कारण एक ई पिरवार रा चार जणा री मौत व्हे ग्यी जदके एक टाबरी अर एक महिला घणी ज़ख्मी व्हे ग्यी। अतिरिक्त पुलिस अधीक्षक जिनेन्द्र जैन बतायो के कार मांय सवार सगळा लोग हनुमानगढ़ जिला रा रावतसर रा रेहवासी हा, जो फिलहाल किशनगढ़ मांय रह रह्या हा।

000

प्रधानमंत्री नरेन्द्र मोदी आकाशवाणी ऊं 29 जून दीतवार ने प्रसारित कर्या जावण वाळा खास कार्यक्रम मन की बात मांय विचार बतावेला। आ ई रेडियो कार्यक्रम री 123वीं कड़ी व्हेला। आप ई ई सारू मुफ्त नम्बर **1800—11—7800** माथे 27 जून ताई राय भेज सको हो। ई रे अलावा नरेंद्र मोदी एप या माय जीओवी ओपन फोरम रे जरिए ई सुझाव भेज्या जा सके है।

000